Svargnor Maynal

Heaven's Man

Svargnor Maynal

Heaven's Man Gondi Adilabad Project

© 2023 Wycliffe Bible Translators, Inc.



This project text is licensed under a CC 4.0 International License.

Batal Baga Manta

Padana Niyam

| Book Name | Abbreviation | Page |
|-------------|--------------|------|
| rūtu pustak | rūtu | |
| yōna pustak | yōna | 9 |

Puna Niyam

| Book Name | . Abbreviation | . Page |
|------------------------------|----------------|--------|
| pilemontun lihi kīta ciţi | . pile | 19 |
| yākob lihi kīta ciţi | . yāko | 22 |
| yōhan lihi kīta reņḍava ciţi | . 2yōha | 31 |
| yōhan lihi kīta mūḍava ciţi | . 3yōha | 33 |
| Topical Index | | 66 |
| Names Index | | 77 |
| Maps of the Bible | | 88 |

rūtu

modol vāci kiyval gosţi

id kalit ropo tanvang kāryang pūri kiyan sāṭi, yūdulke āyva yūdulk āyur vūrkun gir bagavantal bahan vāḍakam kīntoro ijrayēl jātitur kari kiyana injer id rūtu inval pustaknaga lihi kīsi manta. rūtu inval veylo mōyab dēsna ānd, ijrayēl dēsna āyo. pōsaṭi veylo āta ad nayomina cokoṭ-vāyuṭ sūḍan sāṭi rūtu tanva parjatun suṭi kīsi, ijrayēl dēsnaga vānta. ijrayēl dēsnor dāvid rājal ani vōnur totturkun id rūtu bahan aval āsi niltayo, id katataga lihi kīsi manta.

id katatun vāci kiyan mune id gosţi kari kīmţ

tole ijrayēl dēsnaga yūda jātitun ropo undi niyam matta. batal itteke kuṭumbataga ivir markmanji ḍagur mari marming āsi mārteke, sērnḍu taṅgen tuṅgsi, tādana āstitun poro adikār vāle āntor. uṇḍe vūrkun mari-miyaḍ jalma āteke, ad āsti markna ānta. undi mōka vorore manji mārteke, ad āsti karumnor pālevāṇḍan ānta. bōrte vōna kuṭumbatal uṇḍe gir pisi mandantero, vūr samdira cokoṭ-vāyuṭ sūḍval jimedāri vōr pālevāṇḍan poro mandanta.

id pustaknal karivalik gosting

bagavantanang icang nama parur ahan pure mayval.

barosate pisvalir hindal bagavantal tanvang kāryang pūri kiyval.

dusrurkun madat kiyvadun hindal, kutumbamun poro, soptalir poro barosa irvadun hindal, vūra pisval tarika māryusi, bagavantal vūrkun ānand siyval.

bagavantana cokoţ-pān sirip yūdulkun sāţine āyo bati samdi jātinur sāţi manta.

bagavantal jagduniyata parjatun cokot sūdval ani vūra pisvadun ropo tanvang kāryang pūri kiyval āndur.

rūtu 1:1 2

yelimelekna kuţumbataga vele duksa vāyval

nāy vehvalir adikārir rāj tākusval gaṭkate* ijrayēl dēsne karu arta. te yūda yēriyata betleham cahartal voror māynal tanva bāykon ani ivir markun piysi, mōyab dēsne pisle sottor. ² vōr māynana porol yelimelek. vōna bāykona porol nayomi.* ivir marknaṅg porolk mahalon ani kiliyon. vūr yūda yēriyata betleham caharte manval yepratiyulk inval sagater āndir. vūr mōyab dēsne sonji, aga piser matter.

³ ahan piser maneke, nayominor māḍso yelimelek mārtor. te rāṇḍe veylo nayomi ani tānur ivir marke meysi matter. ^{4–5} vūr mark mōyab dēsnaṅg pēkin tuṅgter. av pēkiknal undita porol vōrpal, undundita porol rūtu. ahan kami jāda daha sālk āta peje mahalon ani kiliyon gir mārter. te nayomi māḍso ani mark selva pōsaṭi veylo āta.

nayomi betleham caharte malsi sonval

^{6–7} ahan mōyab dēsnaga piser maneke nayomi, "tanva dēsnaga paṇṭaṅg muktari paṇḍnal bagavantal tanva parjatun āsirvād sīsi, pir vāyustor*" injer kēnjta. aden sāṭi nayomi ani tānaṅg kōryak agaṭal yūda yēriyate sonle tayar āsi, sariy pesitaṅg.

⁸ bati ahan sonjer maneke, nayomi kōryakun tōḍo, "miraṭ mī seḍmite malsi soṇṭ.* sātur nā markun poro ani nā poro mīva māriyo ad permatun tohtiṭ. ahne bagavantal mī poro gir tanva māriyo ad permatun tohir.

⁹ bagavantal mīkun āsirvād sīsi, miraṭ uṇḍe undi jōka marmiṅg āsi, mīkun rōn-racca sīnur" injer kōryakun kalita.* ¹⁰ aske raṇḍute kōryak jōrte āḍser, "nī saṅgane nī lōkurga vāntom" ittaṅg.

¹¹ bati nayomi, "nā kōryakniț! miraţ nā saṅga bāri vāntiţ? mī sedmite malsi sonţ. mīkun tuṅgle, uṇḍe nā pīţe mark puţanir intiţ ki batal? ^{12–13} nā kōryakniţ! mī sedmite malsi sonţ. nana uṇḍe voron tuṅga paronacor mātarina āton. undi mōka nākun barosa manta injer nēṇḍ bōne tuṅgsi, ivir markun jalma sīkater, vūr daguk ānal vēri, vūr sāţi miraţ manda parkiţ ki batal? nā kōryakniţ! manda parviţ. bagavantal nākun bayman

^{* 1:1} ijrayēl dēsnaga rājan nēmi kiyvak modol * 1:2 nayomi itteke kusite ani ānandne manval veylo injer artam * 1:6-7 tanva dēsnur sāţi bagavantal kāneta intajam kītor * 1:8 tamva beyena rōn sonji uṇḍe marmiṅg āyavaco inval artam * 1:9 kalival selete mukka burval

3 rūtu 2:2

ātor, aden sāṭine mīkun lākta duksat ter nākun adik duksa lākta" injer aven tōdo vehta.

¹⁴ ad kēnci unde adik ādtang. ad vakatne vorpal poradun kalisi, tanva sedmite sonle pesita. bati rūtu poradun urngi kīsi, matta.

¹⁵te nayomi, "icula! nīva sēriyaḍ tanva parjataga tanva pēndaga malsi sonjer manta. nime gir tān saṅga son" injer vehta.

¹⁶ bati rūtu, "nā pejey vāyma, suṭi kīsi son' injer nākun julma kiyma. nime baga dāki aga vānton, nime baga mandki aga mandanton, nī lōkure nā lōkur, nī bagavantale nā bagavantal. ¹⁷ nime baga sāki aga nana gir sāka ani agane nākun māti kīnir. maran tapsi dusro batay nihgaṭal nākun pāki kiyarte, bagavantal nākun bey ḍagur siksa siyir" injer itta. ¹⁸ id gosṭi kēnci, tanva saṅga vāyle, rūtuna man mārita injer nayomi samje māsi, ad gosṭit bārete julma kiyvakne dab matta.

nayomi ani rūtu betleham caharte yevval

¹⁹ ahan av raṇḍ tākser betleham caharte yevtaṅg, yevta peje, ad

cahartur samdire aven sūḍsi, gul kusi āter. veylok aveknaga vāsi, "id nayomi ānd ki?" injer undit undi pūsi kītaṅg.

²⁰te nayomi "hō nayominay āndun. bati nākun nayomi injer kēymaţ. bāriteke vōr sarvasaktivantal bagavantal nākun bey duksa sītor. aden sāţi nākun nayomi" invaḍun badli māra" inţu. ²¹nan igeţal soneke, gan-gōtne sotton." bati inke bagavantal nākun pōsaţin dāt malusi tattor." miraţ nākun nayomi injer bāri kēyantiţ? maha saktivantal bagavantal nākun bayman āsi, bey duksa sītor" injer vehta.

²²ahan nayomi ani mōyab dēsna tanva kōriyaḍ rūtu, mīre māsi vanjina paṇṭa koyval kālam modol āneke, betleham caharte yevtaṅg.

bōyajna polamnaga rūtu sarva perval

2 nayominor māḍso yelimelekna kāndāntor ḍagur danevantal pālevāṇḍal mattor. vōna porol bōyaju. ² nayomin saṅga mōyabna rūtu, "nākun polamknaga sarva perle sonda sīm āti." polamknaga paṇṭa

^{* 1:20} nayomi itteke kusite ani ānandne manval veylo injer artam * 1:20 māra itteke duksate manval veylo injer artam.
* 1:21 selete "igeţal soneke nahga samdiy matta" injer manta.
* 1:21 selete "nākun batay selvakne malusi tattor" injer manta.

^{*} **2:2** musaparir āyi, rāṇḍe veylok āyi, pōsaṭir āyi seleke uṇḍe dusrur bōre garib lōkur āyi, koyneke vahukne tūrta sarva pera vaco injer hebriyulkna niyamnaga lihi kīsi manta.

rūtu 2:3 4

koyusval kārobāri bōre nā poro daya tohci sarva perle vopanurte, aga sarva peranton" injer pūsi kīta. aske nayomi, "nā kōryaḍi son" injer vopta. ³ te rūtu undi polamnaga sonji, aga manval kārobārin "id polamnaga sarva perkay?" injer pūsi kīta. ani būytalir koyneke suṭi kītatun pejey-pejey perser matta. tana perser manval polam yelimelekna kāndāntor bōyaj inval cuṭamna ānd inval tān tāva sele matta.

⁴ bōyaju betlehamnal polamnaga vāsi, būytalir saṅga, "bagavantal mī tōḍo manir" ittor. te vūr malsi "bagavantal nīkun āsirvād siyir" itter. ⁵ aske bōyaj būytaliror kārobārin saṅga, "ad bad ḍiya ānd?" injer pūsi kītor. ⁶ te vōr kārobāri, "nayomin saṅga vāta, ad mōyab dēsna ḍiya ānd. ⁷'būytalir pejey sarva pera sīm' injer nākun pūsi kīta. te 'pera' injer vehton. te sakeḍalte iṅke vēri, perseren manta. bati gaṭkamen mātram guḍsetaga sonji āram yēcci vāta" injer bōyajun vehtor.

bōyaju rūtun poro daya tohval

⁸ aske böyaju rūtun saṅga, "bāyi nā gosti kēnja, id nā polamun suti kīsi, dusrona polamnaga sonma. igen nāvaṅg būytekun karum sarva perser man. ⁹ vūr būytalir bagate paṇṭa koyser mandantero, vūr pejeyen sarva perser man. vūr diyurkun böre nīkun nōyusva injer hukum sīton. nīkun yēr vatka vasteke, būytalir cēndi kīsi irtang buddinaga sonji, yēr un" injer vehtor. ^{10–11} aske rūtu bōyajun poro vele mānde mur-tongrang kotsi būd sūdser, "nanate dusro dēsnona āndun, bati nā bārete batal kari kīsi, nā poro daya tohcer manti?" injer gul āsi, bōyajun pūsi kīta. te bōyaju, "nī mādso mārta peje, nime nīva pōradun kīta cākoratun bārete nākun samdo vodki āta. nime nīva kutumbatun ani nīva dēsun suti kīsi, iden mune vodki sele matter vūr parjataga pisle vāti. 12 bagavantal nime kīta aden malsi āsirvādna pandi sīnur. ijrayēlknor bagavantanang mārelkun būd volsi bace māyle vāti. vore nīkun dagur inam sīnur" injer vehtor. 13 te rūtu, "mālka, nan nīvang būyteknaga undita āyvek gir nā poro daya tohci, nā saṅga cokote vadkti. nīva daya nā poro mani" injer itta.

bōyaju duparita nehli tinle rūtun kēyval

¹⁴ duparita yēlate, "nime ige vāsi, icur sāri yēcci kuside tin" injer bōyaj tān sanga vehtor. te būytalir karum nehli tinle utta. aske bōyaju tān poheng sītor. te tindanaccor tinji icungsi meyusta. ¹⁵ ani sarva perle tētta. aske bōyaj būytalir sanga, "rūtun sadin karum gire pera sīmţu. bōre tān āpusmaţ. ¹⁶ sarva pernal tān sāţi 5 rūtu 3:7

muṭinagaṭal icuk-icuk tuhcer soṇṭ. tān bōre rāṅg siymaṭ" injer būytalirkun hukum sītor.

bōyajun bārete nayomi kēnjval

¹⁷te rūtu nulpe vēri ad polamnagan vanjina sarva perta ani aven kohkta. te av lage undi bīvdamen ātang. ¹⁸ av vanjing piysi, rūtu betleham caharte manyal ron vata, aske atihare nayomi sūdta, te tana petimen tineke meyusi tattang av poheng ātiharen sīta. ¹⁹ aske ātihare, "nēnd nime baga kām kīti? bōna polamnaga sarva perti?" injer pūsi kīta. "nī poro daya tohvan bagavantal āsirvād siyir" injer itta. te rūtu, "ad polamnor mālkana porol bōyaju bere" injer vehta. ²⁰ aske nayomi, "vor boyaj mākun karumnore pālevāndal āndur. pisi matturk ani sāturk gir vor madat kīser mantor. mākun gir cokot-vāyut sūdvalirgatal voror āndur. māriyo ad perma tohval vor maynan bagavantal āsirvād siyir" injer korvadun sanga vehta. ²¹ aske movab desna rūtu, "acore āyva, nā saṅga 'tanva panta samdo koysi mārnal vēri tanvur kām kiyvalir barobar sarva perle vara' injer vehtor" itta. 22 te nayomi, "nā kōryadi, vōnaṅge būytekun karum sarva perser man. dusrona polamnaga sonma, undi moka dakite böre nīkun taklib sīnir" injer köryadun vehta. ²³te rūtu vanjina panta koyval

kālamnal te gohkna paṇṭa koysi mārnal vēri, bōyajnaṅg būytekun saṅga sarva perser ātiharena rōn piser matta.

nayomi rütun saṅga batal bahan kiyana injer vehval

3 undi diya nayomi rūtun saṅga, "nā kōryaḍi, nīkun voror māḍso matteke, nīva cokoţ-vāyuţ samdo sūdsi vētndur. iden bārete nana tapvak batal ter kiya lāgar. ²bonang būytekun pejeyen nime sarva pertiyo vor boyaju mākun karumnor pālevāndal āndur. icula! nēta rātun kadataga gohk kohkusi tudusantor. ³nime yēr tuṅgsi, gama gama gādi siyval niy (sent) sōksi, nihga manvaliknagatal cokotna kapdi pōndsi, kadataga son. vōr tinal unal vēri vōn disvak man. ⁴vōr baga mīndantoro ad dihante sūdsi, von karum sonji, vonang astur kalkna dupati terisi kālvada mīnda. nime batal kiyanayo vor vehantor" injer itta.

⁵te rūtu, "miraṭ vehta tīr kīnton" injer ātiharen javab sīta.

rūtu bōyajun bēţe māyle sonval

⁶rūtu kaḍataga sonji, ātihare vehta tīr samdo kīta.

⁷ bōyaju peṭimen tinji, ānandne ad rāsita handa bāj sonji, mīṇḍtor. aske rūtu nehāre sonji, vōnaṅg astur kālkun poroda dupati terisi rūtu 3:8 6

agane mīṇḍta. ⁸ naḍḍum narka jōpne miḍuṅgneke kudurkne āsi tēttor ani tanvaṅg astur kālkun karum undi veylo mīṇḍsi manval kari kītor. ⁹ ani, "nime badeni āndi?" injer bōyaj pūsi kītor. te "mālka! nana rūtuna āndun. nime nākun karumnor pālevāṇḍani āndi ani nāva cokoṭ-vāyuṭ sūḍval jimedāri nī poro manta. aden sāṭi nīva dupaṭi, nā poro jarasi muca"* injer itta.

¹⁰te bōyaju, "bāyi, bagavantal nīkun āsirvād siyir. nime pahje itteke garibe āyi danevantale āyi diyon sūdsi, tuṅga parndi. bati nime ahan kiymaki. nime nayomina kutumbat poro modol tohta dayatunter adik nīva māriyo ad permatun tohcer manti. ¹¹ aden sāti bāyi nime verima. nime itta ad samdo kīnton, nime cokotna gun-gān vāle pēdini āndi injer samdirkun ţāvaye. 12 nana karumnor pālevāndana inval karale ānd ani nīkun cokot-vāyut sūdvana āndun. bati nākun ter karumnor unde voror mantor. ¹³ id rātun nime igen man. nīva jimedāri yētantor batalo sakren von pūsi kīsi, kari kīnton. undi mōka vōr jimedāri yētveke, nanay nīva jimedāri yētanton injer jīva vāle yehova bagavantana porode vot vātsi

vehcer manton. ujde mānal vērite, igene narma" injer vehtor. ¹⁴te ad vona kālvaday narumta. voron voror vodke māyvak jur-jur sikaţi maneken tētta. aske bōyaju, "nime kadataga vāta gosţi bone vehma" injer rūtun saṅga ittor. ¹⁵ani "nīva koṅgu tāra" ittor. ahan ineken ad tārta. te bōyaj sāruṅg adliṅg vanjiṅg kahci gaţi dohci, tōcustor. aske rūtu caharte malsi sotta.*

rūtu kaḍatal nayominaga malsi sonyal

¹⁶tanva ātiharena rön yevta peje rūtun, "nā köryadi, nime sotta kām batal āta?" injer nayomi pūsi kīta. aske rūtu, tanakun bōyaj batal bahan kīka injer vehtor ad samdo vehta. ¹⁷"ade āyva vōr, 'rikam keykne ātiharena rōn sonma' inji, sāruṅg adliṅg vanjiṅg sītor" injer gir vehta.

¹⁸ aske nayomi, "nā kōryadi, batal bahan jargantayo kare mānal vēri dīra. id gosti nēndu tivusnal vēri, vor boyaj gap-cuk manor" injer rūtun vehta.

bōyaj ani uṇḍe voror pālevāṇḍal

4 ad vakatne bōyaju caharta pāṭakun karum manval parja

^{*} **3:9** cokoţ-vāyuţ sūḍval jimedāri yētton injer samdirkun tohan sāţi, yūda jātiter marming āneke, novral novrin ihne dupaţi mucusīntor.
* **3:15** selete "aske bōyaj malsi caharte sottor" injer manta.

7 rūtu 4:12

udval jāgataga uttor. tana vehci mattor vor cokot-vayut sūdval pālevāndal vāser maneke, "dāda! ige vāsi uda" ittor, te aga sonji uttor. ²vōr utta peje bōyaju ad cahartur daha jank daguk vedilkun gir kēvustor, te vūr vāsi aga utter. ³ aske bōyaj vor pālevāndan sanga, "mā pālevāndal yelimelekna veylo nayomi mōyab dēsnal malsi vāta. ad nayomi ińke, 'tanvor mādso yelimelekna bomi vomka' injer manta. 4 iden bārete nīkun gir vodki arusana injer vicar kīton, ige ucci manvalir vedilkun mune ani vīr samdir mune id bomitun yētka indkite, yēta. undi mōka yēton indkite, nākun veha. ad bomitun vētval hak nī pejev nākune manta" injer vehtor, te vor palevandal, "nanay yētanton" ittor.

⁵ aske bōyaju pālevāṇḍan saṅga, "nayominagaṭal ad bomi yētan nēṭi, sātor vōr mahalonta bāyko mōyab dēsna rūtun gir nimey tuṅga lāgar. bāriteke ad jāyjatun poro sātor vōna porol rāki kiya lāgar" injer vehtor.

⁶ ad kēnci, vōr pālevāṇḍal, "ahan behete, nana yēta paron. bāriteke nā tōdo pudtur markna porode ad āya paro. aden sāţi nā badli nimey ad bomita īsatun yēta" injer vehtor.

⁷tole ijrayēl jātitaga cutal-band tamva tama jāvjatun vētneke āvi, vomneke āyi, voror tanva cepul tendsi unde voron siyana. vomta yēttata pūri kiyan sāti ītal rivaj tākser matta. ⁸ aden sāti vor pālevāndal, "nimey ad bomitun yēta" inji, tanva cepul tendsi bōyajun sītor. ⁹aske bōyaj daguk vedilkun mune ani aga manvalir samdir sanga, "nēnd mirate gava mantit. yelimelekna, kiliyonta ani mahalonta samdo jāyjatun nayomina keydal yētton. ¹⁰ sātor vōna porode jāyjat rāki kiyan sāti, vona porol kutumbataga ani caharta janoba lekatal pāsi vātvak manle, nana mahalonta bāyko mōyab dēsna rūtun sanga pāt ānton. id samdotun nēnd mirațe gava mantiț" injer vehtor.

11-12 ad kēnci aga ucci manvalir vedilk ani ad pāṭaknaga nilsi manvalir parja, "hō! hō! mamoṭe gava mantom. bagavantal yākobnaṅg* bāykok rāhel ani lēyan āsirvād sītape, nīva rōn vāta veylon gir vele mari-miyad āyan lāsi āsirvād siyir. yepratiyulkna sagaturgaṭal dan-davlatne baḍe māsi

^{*} **4:11-12** bagavantal yākobna poroḍun badli kīsi ijrayēl injer irtor.

rūtu 4:13 8

betleham cahartaga cokoṭna porol kamay kīnir. bagavantal id ḍiya pēḍin hindal nīkun siyval santān, tāmaru ani yūdanor mari peresuna* kuṭumbat dāt bade māyir" injer itter.

rūtu marin jalma siyval

¹³ te böyaju rütun sanga pāṭ āsi, tanva rön vötor. tān sanga maneke, bagavantal tān āsirvād sītor. te ad pīṭe manji, marin jalma sīta. ^{14–15} aske veylok nayomin sanga, "nīva köriyaḍ nīkun yēḍvir markun ter adik mayate sūḍanta. bagavantane ḍagur-pān vāyi bāriteke nīkun tangmarin sītor ani vör nīva mātari-pānda jimedāri yētanur. vör moḍḍal pūro ijrayēl dēsnaga cokoṭna porol kamay kiyir. vör moḍḍal nīkun ānand sīnur ani mātari pānde pōsi kīnur" injer ittang.

¹⁶ aske nayomi vor moddan korate yecci, von marking kiser matta.

¹⁷ ājubāju manvalik veylok, "vōr moddal nayomin sāṭi pudtor" inji, vōn obedu* inval porol dostaṅg. vōr obedu yesayin miytor. yessayi dāvid rājan miytor.

rūtu ani bōyajna vēli

¹⁸ id peresuna kāndānta vēli: hesron peresna kāndāntor. ¹⁹ rāmu hesronta kāndāntor. amminadābu rāmuna kāndāntor.

²⁰ nayasōn amminadābna kāndāntor.

salmān nayasonda kandantor.

- ²¹ böyaj salmānta kāndator. obed böyajna kāndator.
- ²² yessayi obedna kāndator. dāvid yesayina kāndator.

^{*} **4:11-12** peresu yūdanur marknagaṭal voror āndur ani yākobnor taṅgmari āndur. vōr maḍanor mari āyor bati vōna kuṭumba samdir tādal-tamukun ter adik baḍe māta. bōyajnur totturgaṭal peresu voror āndur.
* **4:17** obedu itteke sēva kiyval injer artam

yōna

yōnan bagavantana hukum kēnja vāyval

tole bagavantana vacan amitayinor mari yōnan pāve māsi, "nineva inval muke naguḍera pāp jāsti āyval nana sūḍton. yōna nime tēcci aga sonji, 'bagavantal id naguḍun nāseḍam kiyval mantor' inji, vūrkun pacar kīsi veha" injer hukum sītor. ³ bati yōnal bagavantana hukumun kātri kiyvakne vōna carnatal parar āyana inji, urpaṭa yoppeku caharde sottor. ani tārsisne* sonval ḍagur rūkatun sūḍsi, ţikiṭ yēcci pesitor.

vadi-dündade rüka könde mäyval

⁴aske bagavantal samdurtun poro dagur vadi-dūndad vāyusītor. ad vadi-dūndade bey dagur tupān tētta. aden hindal rūka tukdeng āsi, sonval gati vāta. ⁵ rūka tākusvalir samdire bey verisi, tamvang pēnkun hētu kīser kiliter. vūr rūkat halko kiyana inji, rūkate vōser manvalik cījkun samdurtaga vādi sīter. aden munene yōnal rūkata būdna antartaga sonji, bey narumser mattor. ⁶ te rūkator kepţen vōnga sonji, "rēy jōpliya! nīkun iṅke bahan jōp piyta? nime tēcci, nī pēndun hētu kīm. mōka ad pēnter daya tohteke, maraṭ muḍuṅgvakne pisa parantaṭ" injer yōnan saṅga ittor.

vadi-dündad väyan säti käran

⁷aske rūka tākusvalir tamva tama, "marat citing vātsi, id gandam bon hindal vātayo kari kīkat" inji, citing vādteke cititaga yōnana porol pesita. ⁸te vūr, "nī hindale id gandam vāta? nime batal kām kīnti? nime bagatal vāti? nīva bad dēs ānd? nīva bad jāti ānd? iv samdo mākun veha" injer pūsi kīter. ^{9–10} aske vōr, "nana hebri jātitona āndun. samdurtun ani bomitun gadi kītor, vor svargnaga manval bagavantana bakti kiyvana āndun, bagavantana hukumun kātri kiyvak dusro bāj sonjer manton" injer vūrkun vehtor. te vūr unde adik verisi, "nime ihin bāri kīti?" injer pūsi kīter. ¹¹ad vakatne samdurtang helvang vadi-dūndade bade māser mattaṅg.* yōnan saṅga vūr, "iṅke av sim-sam dabe māyana itteke, nī sāţi mamoţ batal kiyanayo veha" injer pūsi kīter. ¹²te "nana kīta tapun hindale, id vadi-dūndad vāta. aden sāti nākun

^{*} **1:3** tārsis itteke inkeḍa spēyin dēs. poṅg-poṅg āser matta.

^{*} **1:11** av helvan hindal rūka yētun poro

yōna 1:13 10

tahci, samdurtaga vāṭaṭ. aske samdur sānt ānta" injer vehtor. ¹³ter bati vūr rūkatun ḍarḍite tarle bey kōsid kīter. bati vaḍi-dūndaḍe samdurtaṅg helvaṅg baḍe māyval kīneke, rūkatun ḍarḍite tara parmaki.

yōnan samdurta yētaga tahci vātval

¹⁴ aden sāṭi vūr, "yē bagavanta! mā vinti kēnja! nimey id gaṇḍam vāyusīti. vēr māynal batay tap kiymaki. ter bati vēna paran ṭeṇḍantom. iden hindal mā poro kasur vāṭma" injer kiliser, ¹⁵ yōnan tahci samdurtaga vāṭter. vāṭnekene samdurtaṅg helvaṅg sim-sam dabe mātaṅg. ¹⁶ id sūḍsi vūrkun bagavantana vere piyta. te bagavantan mok kaṇḍi kīsi, baktite tākle gosṭi sīter. ¹⁷ ad vakatne undi ḍagur mīn yōnan miṅgana injer bagavantal tayar irsi mattor. yōnal mūnd dihaṅg mūnd rātk ad mīnda peṭit ropone mattor.

yōnal bagavantan pārtana kiyval

ad mīndun ropoḍal yōnal tanvor bagavantan ihin pārtana kītor,

²"nana id ḍagur gaṇḍamne maneke, nīkun pārtana kīton. nimey nākun javab sīti.
nāva jīva sonjer maneke

nana nīkun vinanti kīton, te nime nāva vinantitun kēniti. ³nime nākun kōl samdurta adgnaga vātusti, helvang sirmut āsi, nākun nīvang yētang bovring mudustang. ⁴'nīva carnatal nana tūte māsi gire, nīva pavitra mandirteke malsi sūdka' injer sonc kīton. ⁵ nākun nēska vāyvak samdurta yēr gēr-pāsi mucta. samdurta jādi nā taladaga sirmut gunde māta. 6 nana basketke poro vāyvakne darturi tanvang kāvak kehta. samdurtang gutana adgun būd reysi manton inji matton. bati nā bagavanta yehōva nime, nāva jīvatun marantal pisusīti. ⁷ nāva iīva bēvos āneke nana nīkun hētu kīton. nīva pavitra mandirtaga nā vinanti yevta. ⁸ kām siyong av mūrtina bakti kiyvalir nīva permata-dayatun tamva keyde sodusanter. ⁹bati nana nīva dagur-pānda pāta vārser, nīkun mok kandi kīnton, nan kāl karta mokun kandi kiyvakne sonon. nimey baci kiyvani āndi"

injer bagavantan pārtana kītor.

11 yōna 4:2

¹⁰ aske bagavantal ad mindun hukum sitor. te ad min yonan dardite kaksi vadta.

bagavantana hukumun yōnal vopval

aske bagavantana vacan undundi jōka, "nime tēcci nineva inval muke naguḍe sonji, nan nīkun vehta kabuḍun aga pacar kīm" injer yōnan kēnja vāta. ³ aden sāṭi yōnal tēcci, bagavantal hukum sīta tīr nineva naguḍe sottor. id ḍagur naguḍun hinda bājnal handa bāj vīḍana itteke mūnd rōjk lāgndu. ⁴ yōnal ad nineva naguḍun ropo nēṅgsi, undi diya tākanacor lak tāksi, "uṇḍe cālis rōjkne id nagur sate nās ānta" injer pacar kītor.

nineva naguder lökur cuk cuke māyval

⁵te nineva naguḍer yōnal vehta bagavantana gosṭit poro barosa irsi, upas manval dinam ṭari kīter. garib-haribna, bēd-bāv selvak samdire pāpnal maltom inji, tohan sāṭi pōteṅg* gūṇḍi kīter. ⁶ ad nineva naguḍor rājal kēnci tana gir kacurital reysi tana pōṇḍsi matta ad rājalir pōṇḍval kapḍi kuḍusītor ani pōte gūndi kīsi nīrdun poro uttor.* ^{7–9} utta

peje nineva nagudor rājal, "nana ani nāvur mantrir ihin nirnay yēttom: mamot samdir ani janvar gir upase mandana. itteke veylo-māynal ani dor-janvar batange tinva unva. samdire tamo kiyvalik karab kāmk suti kīsi, tamo julmate kiyusvalikun marnga lāgar, veylo-māynalir pōteng gūndi kiya lāgar ani janvarkun poro gir pöteng vata lagar. maynalir samdire tamva tan-mande pūro bagavantan vinti kiyana. ihin marat kīteke mōka bagavanl tanakun vāta vele sõngun kami kīsi mā poro daya tohci mākun nāsedam kiyvak dānur" injer haval dāralir sanga nineva nagude vehusītor. 10 ad nineva naguder tamvang karab kāmkun suti kīter. ad sūdsi bagavantal man māryusīsi mune vehtapinay vūrkun nāsedam kiymaki.

yōnan duksa lāgval

id sūḍsi yōnan bey duksa lāgta ani sōṅg ātor. te ihin pārtana kītor: "yē bagavanta! nime daya ani dil-dārtor bagavantani āndi. ani sōṅgun vāyvak perma kiyvani āndi injer ṭāvay. aden sāṭi vūrkun nāseḍam kiyvak māpi kīnti injer gir nākun ṭāvay. nā dēsne maneken nana ihin āyar injer sōnc kīsi, nineva

^{*} **3:5** tole av pōteṅg janvarta tōlde ani gore būrane tayar kīndir.
* **3:6** tanva tana bagavantan mune cuḍur-pān kīsi dusrurkun tohan sāṭi nīrdun poro uttor.

yōna 4:3

naguḍun badli tārsis sonle pesiton. ³ yē bagavanta! nākun jaka. bāriteke nana vūrkun vehtapinay jargser sele. aden sāṭi pisvaḍun ter sātay nayam" injer bagavantan vinanti kītor. ⁴ ad kēnci bagavantal "nana vūrkun nāseḍam kiymaki inji nime sōṅgun vāyma" injer vehtor.

vēli ani pudi

⁵ aske yōnal ad naguḍa siḍayiṅg bājneke sonji, aga undi maṇḍa vāṭsi, "naguḍun batal bahan āntayo sūḍka" injer ad daḍmite uttor. ⁶ bagavantal yōnan vāta duksa kami kiyan sāṭi yōnana talat poro daḍmi sīnal undi vēlitun pirusi bersusītor. ad vēlitun sūḍsi yōnal bey kusi ātor. ⁷ bati dusro nēṭi bay-bay āneke bagavantal undi pudit tayar irsi mattor. te ad puḍi vēlitun katri kīta, aske ad vēli vār jūrta. ⁸ kadak yeddi terneke kāsta vadi gir sidaying rohtor. yonana taladun yeddi lākta. te vor bēvos āsi. "pisvadun ter sātay nayam" ittor. ⁹aske bagavantal, "id vēlitun hindal gir nime bāri sōngun vāti?" injer yōnan pūsi kītor. te yōnal "hō! nākun sāyana acor sōng vāta" ittor. 10 bati baqavantal "nime kastam kiymaki ani ad vēlitun posi gir kiymaki, undi rātne putsi bersi undi dihaten var jurta id vēlitune randi kīser manti. 11 te. tap-vop kare māyo vūr undi lāk vīsa hajarkun ter adik māndi ani samdi dōr-janvarkne manval nineva inval muke naguda gostitun bārete, nana bacor randi dosa lāgar?" injer yōnan sanga ittor.

gōṇḍi bāsata id pūna niyamun bārete

mune vehval gosţi

bāsa inval māynan bagavantal sīta inam ānd

asal bāsa itteke batal? narimankalir voron voror tamva manda ani dilta ani unde bade samacārtun gostina rūpne artam ānal vehval seleke lihi kīsi manvadun bāsa inter, id bāsa gostine itteke bad gosti baga vāyana inval vākyamna rūpun piysi, kālamun piysi tayar āsi mandanta. ītal bāsa kīnekene id kalitaga narimankal samdo jāti-janvarknagatal alag ani dagur-pānde mantor, id bāsaye māynalira muke gun āndu. iden hindale māynana jāti, rīti-rivaj, kāydang-kānunk ani mān-pānde tākval id duniyaturkun kare mānta. **bāsa bagatal vāta?** bagavantal id kalitun bey sōba gadi kītor. bahan itteke, tīr-tīrknang marakne, rang-rangnang pungakne, dusro-dusro janvarte, dusro-dusrok jātine ani bāsane tayar kītor, bāriteke ihin vele tīrk matteke, bagavantan cokot lāganta. aden sāti bagavantale iv samdo bāsana varamun duniyatur māynalirkun sītor, māynana putgadmi bagavantanal ātapinay, bāsana putgadmi gir bagavantanale āta.

bāsata udes batal? id duniyataga manval har undi bāsatun mān puṭana ani ad bāsatun bārete dihante pariksa kīsi kariyana. id bāsa vaḍkval parja icur-icur maruṅgsi, tān būle māyvak manle, rāki kīsi irana. namunatun bahan itteke, mā kōya seleke gōṇḍi gosṭin ḍiksanarina rūpne, mā kōya bāsatun pustakna rūpne cāpi kīsi irana. ahne pāṭane rūpne ani sinimana rūpne gir tayar kīsi rāki kiyana.

kõyane seleke gõndi bāsate baybil bāri mandana? har voron bāsatun vāci kiyval ani lihi kiyval hak manta. har voron satemun kari kiyval ani artam kiyval hak manta. tanakun istam vāta adenaga barosa irle har voron hak manta. duniyataga manval har voron gir bagavantan bāreta kabudun vāci kiyval ani kēnjvada hak manta. ani tamva sāti manval ad kabur kēnci, man-diltaga sonc kiyval jurat manta. bagavantal mā sāţi batal kītor ani batal tayar kīsi irtor invadun bārete marat inke vēri mā bāsate vāci kiymaki. bagavantal mā samdirkun batal vehcer mantor inval kari kiyan sātine, iden koyane lihi kiyval jargta. id tīrde vor bagavantan kari kīsi, von bārete samje māsi, marat vona sēva

barobar tarikate kiyana injerente, id muke kām kiyval jargta.

baybil itteke asal batal āndu? bagavantale tanvang vacank ani hukumk manyal id grantun tanyur pravaktalirkun ani baktalirkun vehci lihi kiyustor. vīr lihi kiyvalir samdir gir āsiya, āprika ani yūrap invalik mūnd kandalknang, dusrok-dusrok dēsalknaga ani dusrok dusrok pidinaga bagavantal hukum sīta tīr vīr lihi kīter. vīr samdir lag-bag cālis jank matter. vūr iden pandra nuhk sālk vēsu parbu putvak maneke ani, vēsu parbu puţta peje undi nūr sālkun ropo lihi kīter. itteke pūro soda nuhk sālk id baybil grantnang pustak lihi kiyval jargta, idenaga pūro sāt sārung pustak mantang. idenaga rand bagalk mantang: mododa bagamun padana niyam inter ani rendava bagamun pūna niyam inter. bati id grantnaga sirip rendava bāgam koyane anuvād kīsi manta. mododa bāgam unde gir pūro anuvād āyle manta.

ad toleta grant inke manvalir mā köyturang nēki-badin bahan lāgsi manta? köya darmataga tottale sēsanang arpanang ani bakrana balidān siyvalik nēki-bading tākser mantang. iv samdo tīrknang balidānk mākun suk-sāntne irana ani mukti puṭana injer har sāl kīser mandantaṭ.

bati bagavantal mā samdir sāti kēpat kēpat av nēki-bading kiyvakne undiy jōka tanvor marin balidān sītor. id balidāntun hindal mākun svargnaga mukti putanta. marat vor bagavantanur mari-miyad antat. id balidānta gostitun sonc kīteke, bagavantal mākun bacoro lād ani perma kīser mantor inval kare mānta. bagavantal pūro kalitun gadi kītor. tānga manle narimankalir āyvalir mākun gadi kītor. ani nākun hētu kīser, nāva pārtana-vinti kīmt injer vehtor, aden sāti bagavantana gosti duniyataga manvalir samdir sāti, har gatka kāmi siyval āndu. te id grantna jurat mā kōytur sāţi gir vele manta. bagavantana gostitaga manyal satem pidinang piding mārivakne undi tīr manval āndu. ani vor bagavantal mākun sīta vāgdan basken tōd-mōd kiyor. id grantnaga bagavantal mākun mukti siyle vopnal, duniyat ropo marat bahan pisana invalik bagavantanang gosting mantang.

võr bagavantan bahan kari kiyana:

 bagavantana udes: bagavantal nīkun vele lāḍ kīser mantor. vor undi udesun sāṭi nīvur aval-bābona pīṭe nīkun jalma āyustor. nime vor bagavantan kari kīsi, vōn saṅga baskeṭ mīre māsi mandana invale vōna udes āndu. iden bārete, "bagavantal duniyaturkun bey lāḍ kīta kāḍki, tanvor vorore manval marin id darturitaga sāri kītor. vōn poro barosa irval har voror nāseḍam āyvakne, vūrkun baskeṭ gir pisval jīva puṭana injerente ihin kītor" injer id grantna XYZ pējitaga manta (yōhan 3:16).

parjat ani bagavantan naddum manval adcand:

har voror bagavantan kari kīsi, von sanga basket mīre māsi mandana inval vona cokotna udes manta, bati māynalir bona sari vor sonjer manter. ani vor bagavantal nēmi kīta kānun tīr piser selur. ihin bagavantan ulta āsi pisvadun pāp injer kēyanter. id pāp mākun ani bagavantan pāki kīsi vādta, von sanga mīre māsi manvakne ani lāgi-bāgi selvakne kīta. id pāp bagavantan karum basken sonvakne narimankan adcand āsi nilanta ani samdir poro maranta siksa taci vāţanta. bāriteke.

"niyatnor voror gir selor!

niyatnang sarin bārete voror gir artam kiyor! bagavantan mahkval voror gir selor! samdire sari bahke māsi, batatune kāmi siyvak āter" injer id grantna XYZ pējitaga manta (rōma 3:10-12).

3. ad adcandun vidusval bagavantana pilan:

māvang batatune kāmi siyong av kōsidkne maraţ bagavantanaga sonda parvaţ. aden sāţi bagavantale māvang pāpkun barpur kandi kiyvadun tayar kītor. bahan itteke, māynan ani bagavantan naddum addam āsi manval pāpun tendsi vāţlene, yēsu kiristun id kalitaga rohtor. iden bārete, "niyatnor kiristu,

"niyatnor kiristu, bagaḍ-niyatnur āyvalir māvaṅg pāpkun piysi, siksa bōge mātor. ani mākun bagavantanaga karum tarle, undiy jōka mēndoḍa rūpne maran ātor" injer id grantna XYZ pējitaga manta (1va pēturu 3:18).

anuvād kiyval tarika:

mā kōyane id grant baven ādar kīsi anuvād kiyval jargta? dusro dusro bāsane lihi kītaṅg baybilkun vāci kīsi, aven artam kīsi, maraṭ samdir samje māyval mā kōya bāsate lihi kiyval jargta. acore āyva, baske-baskete dusrok bāsanaṅg baybilknaga bade undi gosṭita tēḍa manduyo aske, grīku seleke hebri bāsata baybil gir sūḍsi, adena artamun piysi lihi kiyval jargta.

ihin lihi kīta anuvād baccor vēri nama parnal manta?

- anuvād būr kīter? anuvād kiyval siksān sārung sālk kīsi, anuvādnang niyamkun karisi manvalir mā köytur iden anuvād kīter.
- id anuvādun būr ceking kīter? baybil giyantaga ani anuvād kiyvaḍaga vele anubav manvalir ceking kīter. vūr bahan kīter itteke, baybilta har pustakun, har adyāytun ani har vacantun dihante vāci kīter. ani av vacanknaga taptang-cuktang gosţin ceking kīsi sudri kiyuster.
- 3. kōyane anuvād kīta baybiltun tamva samājnaga vāḍakam kiyle būr vopter? samdo tīrknaṅg cekiṅg āta peje gir, gōṇḍi anuvādna kamiṭitur āyvalir mamoṭ anuvād kīta ad har pustakun dihante vāci kīsi,

mā kōya rivajun piysi uṇḍe jarasi sudri kītom ani mā kōya seleke, gōṇḍi samājnaga vāḍakam kiyle gir voptom.

dusrok bāsana baybiltagaṭal id kōyane anuvād kīta baybil bahan tēda manta?

mododa baybil lihi kīta bāsatun (itteke hebri, arāmik ani grīku) vūr tottur bahante artam kītero, ahne id gaţkate vāci kiyvalir gir samje māyana invale anuvād kiyvada muke udes āndu. nēta divosne vādakam kiyval bāsate baybil lihi kīta kādki, har voror vāci kiyvan seleke kēnivan artam ānta. har bāsata vyākaran ani nirmān alag mandanta. iden hindal, dusrok bāsanaga matta tīr gostitun gosti anuvād kīteke, tole lihi kītang av vele udesk urpating-tirpating antang. aske vāci kiyvalirkun seleke, kēnjvalirkun adenaga manyal karal artam samje māyo. tān unde voror samji kīsi veha lāgar. ītal paresan manva injer ani, vāci kiyval har voron gir cokot artam āyana injer, mamot gostitun gosti anuvād kiyvakne har undi bāgamna artamun anuvād kiyle kosid kītom.

kahi jōkaṅg anuvādnaga artam vāyan sāṭi dusrok dusrok gosṭiṅg vāpri kītom. ani av jāganaga vāḍakam kiyvalik gosṭin vacanta nambartun piysi pējitaga būḍ lihi kīsi mandantaṅg. namunat: mattayi 16:24 "tanva taklibun tana sōsi kīser" injer kōyane

manta. bati grīku bāsate, "modun kānci tākana" injer mandanta. modun kānjval itteke, taklib bōge māyval ani maran āyval.

kahi bāgamknaga kōyane artam barobar vāyan sāṭi, kahitaṅg vacankun mīri kīsi lihi kītom. ³⁻⁵id tīrde raṇḍ seleke adik vacankun mīri kīteke, munetaṅg peje ani pejeṭaṅg mune vacankun lihi kīteke, vāci kiyvalirkun vele cokot samje mānta.

modoḍa bāsata baybiltun dusro bāsate anuvād kiyvalir būre gir āyi adenaga matta tīr artamun barpur (nūṭun nūr partisat) anuvād kiya parur. iden kari kīsi, mamoṭ gir bagavantan vele pārtana-vinti kīser, anuvād kiyle budi-giyantun talkser, mā kōya-kōyturkun bagavantana vacan bacoro kāya-kasṭam kīsi andustom. iṅke māva pārtana batal itteke, māvur veleṭir lōkur id kali gaḍi kiyval ani mā jīvator mālkal āyval bagavantana vacantun artam kiyana, nammana ani vōnor mari āyval yēsu kiristunaga barosa irana. bāriteke

bagavantana sate sari-māragnal ani vacantal bahke māsi sari būle māsi manvalir mā sāṭi, tanvor mari yēsu kiristun rohci, vōna pavitra netuḍa ani jīvata arpana siyustor. ani vōr yēsuna jalma āyvak maneke, lihi kiyustaṅg grantknaga matta tīr tirisi vōn mūnd rōjkne bagavantal nēṇḍustor. vōnga bōrte barosa irantero, vōn mukti puṭanta. iden bārete,

"vēr yēsuna poroḍun suṭi kīsi, darturit poro manvalira bōnay porol mākun baci kiya paro" injer id grantna XYZ pējitaga manta (apo. kā. 4:12).

ani unde undi jāga,

"yēsu parbuye mā mālkal āndur injer mā toḍde vopsi, bagavantal vōn marantal nēṇḍustor injer, mā diltaga barosa kīteken, maraṭ bace māntaṭ" injer id grantna XYZ pējitaga manta (rōma 10:9).

gōṇḍi anuvād kamiţi 2018

pilemōn

pilemontun lihi kīta ciţi

ciţitun bāreta gosţi

lihi kītona porol: pavlu

lihi kīta sāl: kiristu sakam lag-bag sāṭ sāldaga lihi kiyval jargta.

muke gosţi: pavlu jēldaga maneke id ciţi lihi kītor. pilemontur dāsirgaţal onesīmon inval dāsi-māynal parar āsi, pavlu manval jāgataga vātor. pavlu yēsun bāreta cokoţna kabur von vehtor. aske vor onesīm yēsun poro barosa irtor. te inke pavlu onesīmontun vonor mālkanaga sāri kīser mantor. onesīmon itteke, 'pāyda siyval' injer artam. iden mune onesīmon pilemonta kāmun cukḍi kiyval āsi mattor. bati inke bagavantana permata-dayate pavlun, pilemontun ani vīrgaṭal ter yēsu parbunte vele pāyda siyval ātor. onesīmontun māpi kīsi, kāmnaga malsi yētana injer pilemontun, id ciţi pavlu lihi kītor.

dandosk

mā saṅga kām kiyval lāḍnor pilemōntun, appiya bāyin, sipāyin dāt manval arkipun ani mīva rōn mīre māyval carcitur* samdir sāṭi, pavlu invana id ciṭi lihi kīser manton. nana ani mā tamun dāt manval timoti, yēsu kiristuna cokoṭna kabuḍun pacar kīta kāḍki, jēltaga arsi mantom. ³ mā bābo bagavantal ani yēsu kiristu parbu mīkun permata-daya ani sānti siyir!

pārtana ani danevād

⁴ nana baskete nī sāṭi pārtana kīntono, aske nī bārete bagavantan danevād vehcer mandanton. ⁵ bāriteke, nīkun yēsu parbun poro manval barosa ani yēsunur baktalir poro tohval nīva lāḍ ani permata-dayatun bārete nana kēnjton. ⁶ maraṭ undi tīrda barosatur āta kāḍki, yēsu kiristunaṅg samdi āsirvādkun bārete, nīva giyan ad barosatun hindal, baḍe māyana injer

^{*} **1:1-2** undi saṅgam āsi manvalir yēsunur baktilir.

pārtana kīnton. ⁷yē dāda! pavitra yēsunur baktalirkun lāḍde vele madat kīsi, vūrkun ānand sīti. id gosţi nāva diltun gaţi-dīrya sīsi, vele ānand sīta.

onesīmon sāţi vinanti kiyval

⁸ nime kiyvalik kāmkun bārete yēsu kiristuna poroḍe hukum sīnal nākun adikār manta. ⁹ bati veḍil māynanal āyval pavluna yēsu kiristun sāṭi jēl bōge māser, nīkun permate kōrser manton. ¹⁰ onesīmontun poro nime daya tohana injer, nīkun vinanti kīser manton. nana jēldaga arsi maneke, vōr onesīmon parbunor baktal āta kāḍki, nā tōḍo puṭtor marin dāt mantor. ¹¹ iden mune nīkun vēn hindal batay pāyda puṭmaki. bati iṅke vēn hindal nīkun ani nākun ivirkunte pāyda manta.

¹² pilemönu! inke nāva taḍakitun möḍi manval onesīmontun nihga sāri kīser manton. ¹³ nime modol nākun bahan madat kītiyo, ahne cokoṭna kabur vehvaḍun hindal, jēldaga arsi manval nākun, inke vēr onesīmon gir madat kiyana inval ica matta. ¹⁴ bati nīva hukum selva nana batay kiya paron. undi mōka id cokoṭna madat nākun kīka indkite, nāva julmate āyva nīva ica matta tīre kīm, injer kōrser manton. ¹⁵ onesīmon kahi rōjk nihgaṭal pāke māsi mattor. baskeṭ gire svargnaga nī sanga mandan sāṭine, ihin jargtayo batalo. ¹⁶ vōr inke sirip

nīvor dāsi māynale āyo bati, kiristun namtor mā barobartor lādnor baktal āndur, yēsu parbun hindal onesīmon nākun ter vele karumnor āndur inji samje mām. ¹⁷te nime nākun bagavantana sēvataga nī barobar manval īsa dāran dāt samje mākite, nākun karum kītape onesīmon gir karum kīm. ¹⁸vēr nihga batay tap tungsi mandanur seleke batay bāki mandanurte, nāva porode lihi kīsi ira. 19'nanay ad bākitun kandi kīnton' injer pavlu invana nanay id gostitun kud lihi kīser manton, bati nime nīva pisval pūro jinganita nākun bāki manti injer nana hētu kiyval jurat sele. ²⁰aden sāti parbun namtor nā tōdo puttor tamun dāt, yēsu kiristun sāti nākun id madat kīsi, nāva dilta icatun pūri kīm. ²¹ nīva mān-marvadatun poro nākun barosa manta, nana talkta aden ter adik kīnti, injer nākun tāvaye. aden sāţine, id ciţi nīkun lihi kīser manton.

²² unde undi gosti batal itteke, vertalir sāţi manval kamratun nā sāţi tayar kīsi ira. nīvang pārtanang kēnci, bagavantal nākun nihga sāri kiyle vopmad mandar injer āsate sūdser manton.

²³ yēsu kiristun sāţi nā barobar jēldaga arsi manval epaprāl nīkun dandos vehcer mantor. ²⁴ nā sanga kām kiyvalir mārku, aristarku, dēmal ani lūkal gire nīkun dandos vehcer manter. ²⁵yēsu kiristu

parbuna permata-daya mīvang ātman sāt mani.

yākob

yākob lihi kīta ciţi

id ciţitun bāreta gosţi

lihi kītona porol: yākob

lihi kīta sāl: kiristu sakam lag-bag cālis siyunalte panas sālkun naḍḍum lihi

kiyval jargta.

muke gosţi: ad gaţkate yākob inval porol veleţirkun matta. vīrgaţal vēr yākob yēsunor tamur āndur. yēsu pisi maneke, vēr yākob vōnga barosa irmaki bati, sāsi-nēṇḍta peje, vōr yēsu karalen bagavantanor mari āndur injer sūḍsi, kari kīsi barosa irtor.

marat taklibknang pariksan võrci mune tākteke, bagavantan poro karal barosa manta inval dusrurkun kare mānta. carcitur sanga ani bahidur lõkur sanga manval tarika sūdsi, karal barosatun bārete kari kiya vaco. kiyvalik kāmk ani vadkvalik gostin hindal, karal barosa manta ki sele injer mākun kare mānta. karal barosatun bahan kari kiyana invadun bārete id cititaga manta.

1 bagavantal ani yēsu kiristu parbunor sēvkal yākobna āndun. duniya pūro pagre māsi manvalir bagavantanur baktalirkun* daṇḍos dosi, id citi lihi kīser manton.

barosa ani budi-giyan

^{2–3} nāvur dādalir-bāyikniṭ! mīkun taklibk ani duksaṅg vāteke gir miraṭ vele ānandne maṇṭ. barosate av taklibk ani duksan meysi mune sotteke, mīkun unde icur vōrcval

gun abbanta injer mīkun ṭāvaye.

⁴miraṭ vōrcval guntaga baḍe māsi
gaṭ āteken, cokoṭe barosataga gaṭ
āser bē-kasur vālir āya parantit.

⁵ mihgaṭal bōne budi-giyan selveke vōr bagavantan kōrana. ahan kōrtor vōn, rāṅgi siyvakne kōrtatun ter adik siyval bagavantal āndur. ⁶ bati bagavantan kōrneke, sīntoro siyoro injer anumānamna barosate talkmaṭ. anumānamne talkval samdurtaṅg helvaṅg bahan vaḍide tēdantaṅgo

^{*} **1:1** *bagavantanur baktalirkun:* itteke, bāra kāndanur yūdulkna jātitur lōkur injer grīku bāsate manta.

ahan mandantor. ^{7–8} ātor raṇḍ tīrkne sōnc kiyval māynal tanva sardaga basken barobar tāka paror. aden sāṭi parbunagaṭal tanakun uṇḍe batay putmad mandar injer ātor āsa kiyva.

garib ani danevantal

⁹ garib baktalir tamakun bagavantal sīta ḍagur-pāndun piysi, ānandne manda lāgar. ¹⁰ bati danevantalir baktalir tamakun bagavantal sīta cuḍur-pāndun piysi, ānandne manda lāgar. bāriteke vūr gir jāḍita puṅgaḍun dāt sāya lāgar. ¹¹ pōḍd pesiyanta, ad yedite jāḍi vatanta inval mākun ṭāvaye. jāḍi puṅgaḍa sōbata rūp karab ānta. ahne danevantalir baktalir gir tamvaṅg kāmk kīser, maneken nāsedam ānter.

karab gunk bagavantanal vāyong

¹² duksang vāneke aven vörci meysi, mune sonvalir baktalir āsirvād yētanter. tanakun perma kiyvalirkun bagavantal vāgdan sītor ad jīvata kiriţ* duksang vāneke, barosataga gaţ nilturkun puṭanta. ¹³ bōnay āyi kasur kiyan sāṭi man vitteke, bagavantale nāva mandun vituser mantor injer inva. bāriteke bagavantal tanva mandun kasur kiyan sāṭi vitusor ani mīva mandun ātal budi puṭusor. ¹⁴ bati har māynal tanva kasur kiyana inval budite, niyatun bahke māsi karabna āsataga kōṇḍe māntor. ¹⁵ ātal karabna āsa piṇḍamun dāt baḍe māsi, pāp invaḍun jalma sīnta. ad pāp bersanacor bersi, ātmata sāvdun jalma sīnta.

¹⁶ nāvur lāḍnur dādalir-bāyikniṭ! miraṭ pase māymaṭ. ¹⁷ har undi cokoṭna ani pūro barpur vāle vastu, svargnaga manval bagavantanal vāser manta. vōre bābo hābaḍaga vēḍci siyvalikun nivḍi kītor. av vastuna vēḍcite daḍmi māriyanta, bati bagavantal baskeṭke māriyor. ¹⁸ bagavantal tanva sate gosṭitun hindal tana nivḍi kīta kalitaga maraṭ paṇṭata modoḍa īsatun dāt* mandana injer miytor.

sate gosțitun kēnci ad gosți tīr kām kiyval

¹⁹ nāvur lāḍnur dādalir-bāyikniṭ! id gosṭitun kari kīmṭ. har māynal kēnjle tayar mandana ani vaḍkneke sōnc kīsi jōksi vaḍkana. veyne sōṅgun vāyva. ²⁰ bāriteke māynana sōṅg bagavantal ica kiyval, niyatna sari tākusa paro. ²¹ aden sāṭine mihga manval karab-pāndun ani bagaḍ-niyatun

^{*} **1:12** jīvata kiriţ itteke svargnaga baskeţ manval jīva seleke mōksem. pandusta pantata mododa īsa bagavantanay ānd.

^{*} **1:18** yūdulk

suți kīsi tākaț. mīva man-diltun ropo bagavantal irta ad gosțitun piysi tākaț. id gosți mīkun baci kiya paranta.

²² bagavantana vacan sirip kēnjvale āyo bati, ad vacan vehta tīr tākana. ahan tākveke mīva mirat mōsem kītur āntit. ^{23–24}bagavantana gosti kēnci, ad gosti tīr kiyor vor māynal ārsataga tanva mokom sūdsi, tana bahan mantoro inval bahri sonji, ventane marungvan dat mandantor. ²⁵ bati bagavantana vacantun dihante sūdteke tānga batay kami sele. parjatun ad mōkdo suti kiyusa paranta, aden sāti borte māynal ad vacantun kēnci, ad vehta tīr kīntoro, ad vacantun vor basken marngor, bati ad vehta tīr pisantor. ātor māynal bad kām kīteke gir bagavantal von āsirvād sīntor. ²⁶ bōrte tanva tanav baktana injer vehcer, tanva venjedun jarabne ira paroro, vor tanva tanakun mosem kiyval āntor. vona bakti batatune kāmi siyo. ²⁷ rānde veylokun ani pōsati mari-miyadun taklib maneke, vūrkun madat kiyval baktitune bagavantal körser mantor, ahne id duniyata pāp tanakun tundvakne sudud manval baktitun gir bagavantal körser mantor, ihin kalti selvakne manval baktiye karal bakti ānd.

cudur-pānde sūdva

nāvur dādalir-bāyikniṭ! maymate jaga jaga miḍcer manval, yēsu kiristu parbun poro barosa irvalir miraṭ, bōne bēd-bāvte sūḍmaṭ. ² namunatun voror māynal sōnetaṅg mudaṅg ani bāritaṅg kapḍiṅg kersi ani uṇḍe voror mākḍe mātaṅg kapḍiṅg kersi, miraṭ *mīre māyval rōtaga* vāter iṇṭu. ^{3–4} aske miraṭ bāritaṅg kapḍiṅg kersi saje māsi vāton saṅga, "dāda! nime id cokoṭna kursitaga uda" injer vehci, garibun saṅga, "nime aga nila seleke ige būḍ uda" injer vehteke, miraṭ bēd-bāv tohci, karab budite tasva kītur āntiṭ.

⁵ nāvur lāḍnur dādalir-bāyikniṭ! id gosṭi kēnjaṭ. iden munen tanakun permate bakti kiyvalirkun tanva rāj sīnton injer bagavantal vāgdan sītor. aden sāṭi bagavantale duniyatura naduḍun mune garib manvalirkun barosataga danevantalir kīntor. ani vōre tanva rājna īsa yētana injer vūrkun nēmi kītor. ⁶ miraṭ vīr garib lōkura hijat vōser mantiṭ. bati mī poro adikār tākuser, mīkun kōṭknaga* havli kiyvalir vīr danevantalire āndir ki āyur? oho, vīre āndir! ⁷ miraṭ bakti kiyval kiristuna cokoṭna poroḍun rehci

^{*} **2:6** seleke pancadknaga.

vadkvalir vīre danevantalir āndir ki āyur? oho, vīre āndir!

⁸"nīva nīkun perma kītape nī āju-bājuturkun gir perma kiyana" inval darma-grantna muke hukumun mirat piysi tākteke, ad cokotnay gosti ānd. ⁹bati undi mōka mirat bēd-bāv tohkitte, darmata kānuntang hukumkun piysi bayman āsi pāpir āntit. 10 bāriteke bōre āvi ad kānuntaga manvalik samdo hukumkun piysi tākser, undi hukumun tūti kīsi tākteke gir, vor pūro darmata kānuntang hukumkun piysi tākmaki inval badnam āntor. 11 bāriteke "pīr kiyva" injer vehtor vore, "bonay jīva gir yētva" injer vehtor. aden sāţi voror māynal pīr kiyveke gir undi mōka bōnay jīva yētteke, vōr ad kānuntaṅg hukumkun bayman āsi tāktor āntor.

¹² aden sāṭi mākun mōkdo suṭi kiyval kānuntun piysi, vaḍktatun hindal ani kām kītatun hindal bagavantal tasva kiyval mantor injer dihante tākana. ¹³ bāriteke dusrur poro daya tohur vūrkun bagavantal tasva kīneke, vūr poro gir daya tohor. bati būrte dusrur poro daya tohantero, bagavantal tasva kiyan nēṭi vūr vele santos ani ānandne mandanter.

barosa ani kām kīsi tohval

¹⁴ nāvur dādalir-bāyikniţ! "nākun yēsu kiristun poro barosa manta" injer voror māynal vehtor inţu bati, ad barosa matta tīr kām kiyveke, ātal barosa batatune kāmi siyo. ātal barosa māynan baci kiya paranta ki batal? baci kiya paro. ¹⁵ namunatun voror dādale āyi, seleke undi bāyiy āyi, tinle tindi selvak seleke, pondle kapding selvak matter int. 16 aske mirat vor dadan seleke, ad bayin batay madat kiyvakne, vūr sanga, "sāntite sonji, peţimen tinţu ani mēndol-men kapding pondat, aske mīkun garmi vānta. iv samdo mīkun bagavantal sīntor" injer sirip gostinen vehteke batay pāyda puto. ¹⁷ ade tīrde barosa manta injer vehci, barosa matta tīr kām kiyveke gir ātal barosa vontari āsi sānta.

¹⁸ bati namunatun böre nā saṅga, 'nākun yēsun poro barosa manta' indanurte, aske nana, 'nāva barosatun cokoṭnaṅg kāmk kīsi tohanton' injer vōn vehci, 'nīva barosatun kām kiyvakne toha parki ki batal?' injer pūsi kīnton. ¹⁹ bagavantal vorore mantor injer nime barosa kiyval cokoṭe bati, batal pāyda? ahan būtk gire barosa kīser, verisi tara tara āser mantaṅg.

²⁰ ehe pisați! kām kīsi tohvakne manval barosa batatune kāmi siyo invadun gava pahje ki batal? ²¹ mā tottor bābo abrāhamun hētu kīm. vor tanvor mari isakun balidān siyval bovlat poro bali siyle ānekete, bagavantal vona kāryatun sūdsi, von niyatnor injer voptor ki sele? ²² vōna barosatun keyde kīsi tohval miraţ kari kīntiţ ki sele? vōr tanva barosa bātal inval keyde tohtor. ²³ "abrāham bagavantan poro barosa irtor. aden hindale vōn niyatnor inji bagavantal voptor" inval darma-grantna vacan pūre māta. ad tarikate abrāhamun bagavantanor sōptal inval porol vāta. ²⁴ id sūḍsi, māynal sirip tanva barosatun hindal āyo bati, tanvaṅg kāmkun hindale, niyatnor injer bagavantal voptor inval miraţ kari kīntit.

²⁵ ade tīrde, rāhabu# inval lanje veylo ijrayēl dēsnur kabriyalirkun tanva rōn makusi, samdo mān-maryada kīsi dusro sariy sāri kīta. ad cokoṭna kāmun hindal, 'niyatna veylo' injer bagavantal voptor. ²⁶ bahante paran sele ad mēndol sāta lekate vāntayo, ahne cokoṭna kām kīsi tohur vūra barosa gire sāta lekaten vānta.

mīva venjedun jarabne manal karusaţ

3 nāvur dādalir-bāyikniţ! mihgaţal veleţir bōda vehvalir āymaţ. bāriteke bōda vehvalir mākun vele kaţinta tasva mandanta inval mīkun tāvaye. ² marat samdir gire

bacongo galting kīntat. tana vadkvalik gostinaga undi gir tap kiyor vor barpur gun vāle māynal āntor. ātor māynal tanva pūro mēndodun jarabne ira parantor. ³ marat tākusta tīr tākana ani māva jarabne mandana injerente kondan* vesuni dohantat. ⁴ahne dagur rūkata namuna yētteke gir, bey jörte vadi väsi tän durser vonta. bati tan takusval maynal ad rūkatun peje manval cudusi katetun* tirusteke, tana bēke sondana itteke hake tān malusa parantor, ⁵ahne venjer māva mēndodaga cudusi bāgam ānd. bati ad bey daguk daguk gosting vadkanta. ade tīrde, cudusi mingul dagur kēdatun bacor-bahan dundusantayo sonc kimt.

⁶māva venjer gire undi taḍmit dātnay ānd. karabne ninci manval māva mēndoḍaga undi bāgam āsi manta. ad venjer karabun pūro mēndoḍaga pagri kīsi, māynana jinganitun taḍmit dāt lāvi kīnta. ahan lāvi kiyval saktitun ad venjer pātaḍtal* yētanta. ⁷ samdi janvarkun, piṭe-puraḍun, purg-busitun, samdurtaga manvalik jivras samdotun iden mune ani iṅke gir māynal jarabne irseren mantor. ⁸ bati venjeḍun iṅke vēri bōre tanva jarabne ira parmaki.

^{*} **3:3** grīku bāsate ihin lihi kīsi manta: kōḍata muskuritun lagam dohantaṭ. * **3:4** telugute ad cuḍusi kaṭetun 'cukkāni' inter. * **3:6** pātaḍtal: seleke saytandal injer mandanta.

^{# 2:25} yehōsuva 2:11

27 yākob 4:4

ad venjer jīva teṇḍval vikne ninci avivakne karab kīseren mandanta.

⁹id venjeden marat parbu āyval bābo bagavantan dagur-pān sīntat. ide venjede bagavantana rūpne puttor māynan sāpena sīntat. ¹⁰āsirvād ani sāpena undiy toddal bahri vāser mantang. nāvur dādalir-bāyiknit! ahan marat manva. ¹¹sovor yēr ani cokoṭna yēr baskeṭke undi jalatal pūṭe māyong. ¹² nāvur dādalir-bāyiknit! anjuri maratun marka paṇḍing* baskeṭke sādong. ahne āngur vēlitun anjuri paṇḍing baskeṭke sādong. ade tarikate, sovor yēta jalatal cokoṭna yēr pūṭe māyo.

budi-giyan vālir

¹³ budi-giyan vālir ani samajdārk mī ropo bōre manter ki? ahan matteke vūr sate-pānde tākser, budi-giyan sīta ad cuḍur-pāndun piysi, vūraṅg kāryan tohaṭ iṇṭ. ¹⁴ undi mōka mīva diltaga kuṭa kuṭa ani lālsal gunte manji, ḍaguk ḍaguk gosṭiṅg vehcer satun makusiymaṭ. ¹⁵ mihga manval ītal budi-giyan svargnal reysi vāymaki. id mīkun duniyatal vāta budi-giyan ānd. ītaḍaga bāv-bakti sele. id saytanda budi-giyan ānd. ¹⁶ bahan itteke bagate kuṭa kuṭa ani lālsalik gunk mandantaṅgo, aga jagaḍaṅg

loling ani samdo tirknang karab kāmk mandantang.

¹⁷ bati svargnal vāyval budi-giyan vele pavitra ānd. ad budi-giyan sāntitun perma kīnta. ad bone batay invak sādu āsi mandanta. ad budi-giyan vehta tīr kēnjanta ani dayate sūḍanta. ani ad cokoṭnaṅg kāmk kīser bēd-bāv tohvak mandanta. ad budi-giyan satemun piysi tākanta. ¹⁸ sate-pānde ani sāntite tākvalir ad vijatun vīcci, satna ani sāntita paṇṭatun koyanter.

bagavantan karum varaț

mihga jagḍaṅg ani laḍeyk batatun hindal jargser mantaṅg? mīva diltaga puṭvalik āsan unditun undi arsi vāyva sonjine iv jargser mantaṅg. ² miraṭ āsa kīkiṭ bati, ad mīkun puṭo. ad kuṭa kuṭa gunta āsatun sāṭi māynan jakantiṭ. jagḍaṅg ani laḍeyk kīntiṭ bati, āsa kīkiṭ ad mīkun puṭo. miraṭ kōrta ad mihga mano. bāriteke bagavantan miraṭ talkviṭ. ³ miraṭ bagavantan talkteke gire ad mīkun puṭo. bāriteke mīva suk-bōgun sāṭi karci kiyle karabna āsate talkantiṭ.

⁴id duniyatang suk-bōgun sanga dōstan kīteke, bagavantan perma kītap āyo bati, pīr kītap ānta inval tāva sele ki batal? id

^{*} **3:12** grīku bāsate oliva paņḍiṅg injer manta.

yākob 4:5 28

duniyatur saṅga dōstan kīka inval, bagavantan paga-dāral āntor. 5"bagavantal mā samdirkun sīta, ad ātmate maraṭ tanvay bakti kiyana" injer *darma-grantnaga*, vaṭi āgame lihi kīsi manta intiṭ ki batal? ⁶ bagavantal mākun vele permata-dayate sūḍser mantor. aden sātine darma-grantnaga,

> "bagavantal garvate manvalirkun ulţa tiriyantor. bati kami-pānde manvalir poro permata-daya tohantor"#

injer lihi kīsi manta. ⁷aden sāti, bagavantan mune cudur-pān kīsi mant. saytandun ulta tiriyat. aske vor saytan mihgatal parar āntor. ⁸ bagavantan karum varat. aske bagavantal mī karum vāntor. pāpestalirnit! mīvang pāpkun noraţ. bahke māturniţ! mīvang dilkun sudud-pān kīmţ. ⁹pāpestalirniţ! vicarte ani duksate mant. jörte ādat. kavvadun badli ādser ani ānandun badli duksate mant. ¹⁰ parbuna nadudun mune mīva mirat cudur-pān kīsi mant. aske parbu mīkun dagur-pān sīntor. 11 dādalir-bāyikniţ! mīva mirat voron voror baymante rāngmat. tanvor soptan rāngi sīteke āyi seleke von poro tasva kīteke āyi, vor māynal darmata kānuntun bayman ātona lekate vāntor. mīva

kām sirip ad kānuntun piysi tākana. ad kānun cokoţna seleke vāyuţna injer tasva kiyval mīkun hak sele. ¹² parjatun poro nāyda tasva kiyval ani darmata kānuntaga hukumk lihi kiyusval vorore bagavantal āndur. parjatun baci kiyval ani nāseḍam kiyval gir vōre āndur. te āju-bājutur poro siksa vāṭaṭ injer vehle nīkun bōr adikār sītor?

daguk daguk gosting vehmat

¹³kēnjat! "nēnd selete nādi batter undi caharde sonji, aga undi sāl vēri mandantom, varat! aga bēpari kīsi kotang vele kamay kīkat" injer vehvalirniţ kari kīmţ. 14 nādi batal jargantayo mīkun tāva sele. mīva jīvatun bārete sonc kīmt. mirat juluk disi unde iulukne mavad āsi sonval, pōyata duhartun dātnur āndiţ. 15 ahan invadun badli mirat, "parbu jīvate irteke, id kīkom ad kīkom" injer vehana. ¹⁶ bati mirat ahan kiyvit. lāndi-labad daguk daguk gosting vehcer galting kintit. ¹⁷ aden sāti cokot kiyana inval, tāva manji gir cokot kiyor von pap laganta.

danevantalirkun damki siyval

5 yē danevantalirnit, kēnjaṭ! miraṭ duksate āḍser kiliyaṭ. bāriteke mīkun gācar-gaṇḍalk vāyvalik

^{# 4:6} giyantang gostina 3:34

mantang. ² mīva dan-davlat kadiyanta ani mīvang pānguk velum piyantang. ³mihqa manval sõne ani kūra cilim piyanta, ad cilim mī poro ulta gava vehci, mīvang mēndolkun tadmit dāt dundusanta. iv ākritang divoskne gire mirat vele dan-davlatna dīg vādser mantit. ⁴ kēnjat! mī vahuknaga kām kiyvalir būytalirkun, mirat būti siyvakne pasi kītiţ. vūrang būting mī poro piradi kīser mantang, vūr būytalira ādval svargna dalamnor parbunang* kevkun kenja vata. ⁵bomit poro mīkun pasand vāta tīr suk-bogne piser, koyval dinamun sati, mīvang dilkun kodyusi tayar kīser mantiţ. ⁶ miraţ niyatne tākvalirkun siksa vātsi, vūrkun jaktit bati, vūr mīkun marla badmaki.

samdotun võrci mune dāyana

⁷ aden sāṭi dādalir-bāyikniṭ! parbu malsi vānal vēri, miraṭ vōrci cokoṭe sūḍser maṇṭ. bahan itteke, voror kētidāral tanva bomitaga vāṭval cokoṭna paṇṭatun sāṭi, bahan sūḍser mandantoro dihante kari kīmṭ. vōr kētidāral modoḍa pir vāsi* paṇṭa piranta agaṭalte bersi, paṇṭa koyle vānal vēri vōrcikun cokoṭe sūḍser mandantor. ⁸ miraṭ gir mandun gaṭ kīsi, vōrci sūḍser maṇṭ. bāriteke

parbuna malsi vāyval vakat karum vāser manta. ⁹ nāvur dādalir-bāyikniţ! voron poro voror cahḍiṅg vehmaţ. ahan vehturkun parbu siksa vāṭantor. kēnjaţ! vōr nāyda tasva kiyval adikāri veyne vāyval mantor.

¹⁰ nāvur dādalir-bāyikniṭ! parbun bārete vehtur *parvaktalir* taklibk bōge māter. vūr parvaktalira namuna yēcci miraṭ tākaṭ. ¹¹ taklibk vōrci barosate tākturkun āsirvād yēttur intaṭ. yōbuna vōrcval guntun bārete kēnci mantiṭ. parbu vōn ākrit bātal inam sītor inval miraṭ sūḍtiṭ. parbu vele daya ani kivul vāle āndur. ¹² nāvur dādalir-bāyikniṭ! samdin ter muke batal itteke, svargna poroḍen āyi, bomita poroḍen āyi, uṇḍe dusro batatay poroḍen āyi, miraṭ voṭ vāṭva. sirip batal manta ad vehaṭ. ahan matta tīr vehteken bagavantal mīkun siksa vātor.

¹³ mihgaṭal bōre āyi taklibknaga arsi matteke, vōr pārtana kiyana. ānandne mattor vōr, bagavantan pārtana-vinti kīser pāṭaṅg vārana. ¹⁴ mihgaṭal bōre āyi yeḍki-dukne matteke, carcitur pedolkun vōr kēyusana. vūr vāsi parbuna poroḍe niy sōksi, vōn sāṭi pārtana kiyana. ¹⁵ ahan barosate vūr pārtana kīteke, vōr dukelal cokoṭ āntor. parbu vōn cokoṭ kīntor. undi mōka vōr pāpk kīsi matteke, vōnaṅg

^{*} **5:4** *svargna dalamnor parbunaṅg:* itteke sakti vāle bagavantal. * **5** ursan vakatne jarasi pir vānta ani panta koyan mune bey pir vānta.

^{*} **5:7** ad jāgataga

pāpkun parbu māpi kīntor. ¹⁶ aden sāţi bave pāpk kīsi mankiţte, bōnaṅg vohk pāpk mī naḍḍum miraţ vopaţ ani voron sāţi voror pārtana kīmţ. iden hindal, mīva tabiyat cokoţ ānta. niyatnona pārtana vele saktite manji bacoro cokoţ kiya paranta.

¹⁷ yēliyal mā dātnore sādaran māynal āndur. pir arva injer tanva mande pārtana kītor. te saḍe mūnd sālk vēri, bomit poro pir armaki. ¹⁸ ad āta peje pir arana injer marla pārtana kītor. aske hābar pirdun arusta ani bomi tanga urstang paṇṭang paṇḍusta.

¹⁹ nāvur dādalir-bāyikniṭ! mihgaṭal bōre āyi sate sardun bahke māteke, vōn malsi satnaga tatteke id gosṭitun kari kīmṭ. ²⁰ pāpestan pāpna sarital sate sarde malustor vōr, pāpina ātmatun marantal tapusi, baci kiyustor āntor. ide āyva pāpinaṅg pāpkun bagavantana keyde vōr māpi kiyustor āntor.

2va yōhan

yōhan lihi kīta reņḍava ciţi

id ciţitun bāreta gosţi

lihi kītona porol: yēsu kiristunor sisyal āyval yōhan.

lihi kīta sāl: kiristu sakam lag-bag hasi siyunalte novad siyuṅg sālkun naddum lihi kiyval jargta.

muke gosţi: yēsunur baktalir bad satemnaga nilsi mandana. yēsu kiristu māynana rūpne vāymaki injer veleţirkun pasi kiyvalir pesiter. te vūr bārete bahan mandana? barosa irtataga tāna paṇḍi barpur puṭnal vēri, vōrci mune bahan tākana invadun bārete id cititaga lihi kīsi manta.

yōhanta dandos

bagavantana keyde nēme mātur baktalirniţ*, mīkun nāva daṇḍos! nana mī carciturkun pedolta āndun. nana ani satun kari kītur samdir gir mīkun perma kīser mantom. ² mamoṭ bāri perma kīser mantom itteke, satem mā dilknaga manta ani ad basket gir mā saṅga mandanta.

³ bābo bagavantal ani mā yēsu kiristu parbu, mī poro kivul tohci, mīkun *permata-daya* ani sānti siyir. maraţ satem ani permate pisan sāţi vōr madat kiyir.

satnaga nilsi mant

⁴bābo bagavantal mākun āge sītapinay, kahitur baktalir satemun piysi tākval sūḍsi, nākun vele ānand lāgser manta. ⁵lāḍnur baktalirniṭ! maraṭ voron voror permate sūḍana injer mīkun kōrser manton. id hukum pūna āyo bati, modol vehtatune lihi kīser manton. ⁶ perma itteke, bagavantanaṅg āgen piysi tākval. modol miraṭ kiristuna cokoṭna kabur kēnjtiṭ agaṭal, 'voron voror permate sūḍana' invale bagavantal sīta āge ānd.

^{*} **1:1**bagavantana keyde nēme mātur baktalirniţ: bagavantal nēmi kīta veylo ani tānur mari-miyaḍ injer grīku bāsate lihi kīsi manta.

⁷ nana ihin bāri vehcer manton itteke, yēsu kiristu māynana rūpne vāymaki injer pasi kiyvalir veleţir duniyate pesiter. vūr ātur pasi kiyvalir kiristunur paga-dārk āndir. ⁸ miraţ kamay kītatun soḍusvakne, barpur inam puṭnal vēri, vūra keyde pase māyvakne dihante maṇṭ.

⁹kiristuna bödataga nilsi pisval, bābon ani marin vopval āndur. ad bödataga nilvakne tān saṅga uṇḍe adik jöḍi kīsi vehval, har voror bagavantan nammor vör āndur. ¹⁰ āton mīva rön kēymaţ ani vōn cokoṭ-vāyuṭ gir pūsi kiymaṭ.

¹¹vōn cokoṭ-vāyuṭ pūsi kiyval

vōnaṅg karab kāmknaga gir īsa yētta
lekate vāntor.

¹² unde vele gosting nīkun lihi kiyana injer nākun vāţe mānta. te aven sāyte kāgutun poro lihi kiyval nākun pasand sele. bati mīkun baske sūdka inal jīva āser manta. nana mihga vāta peje mukabili vadkana inton. iden hindal mākun barpur anand lāganta. ¹³ bagavantana keyde nēme mātur baktalir,* mīkun dandosk vehcer manter.

^{*} **1:13** baktalir: sēladur mari-miyad injer grīku bāsate mandanta.

3va yōhan

yōhan lihi kīta mūḍava ciţi

id ciţitun bāreta gosţi

lihi kītona porol: yēsu kiristunor sisyal āyval yōhan.

lihi kīta sāl: kiristu sakam lag-bag hasi siyunalte novad siyuṅg sālkun naddum lihi kiyval jargta.

muke gosţi: carciturkun adikāri manval māynal samdirkun bahan sūḍana. dusro muluknal vātur yēsunur baktalirkun permate mān-maryada kiyana. vōr garva-gamaṇḍite manva. samdir gir bey sabās māynal inval gava vōr kamay kiyana. dusrurkun mān-maryada ani permate bahan sūḍana invaḍun bārete, id cititaga manta.

dandosk

soptal gayiyun sāṭi, carcituror pedolta āyval yōhānta lihi kīser manton. nī poro nākun vele perma manta.

² lāḍnor sōpta! nime bāv-baktitaga baḍe mātape, nīva tabiyat gir cokoṭ manji, samdo cokoṭ jargana injer pārtana kīser manton. ³ kahitur yēsunur baktalir* yātra kīser ige vāter. ani nī bārete, 'vōr satemun piysi, cokoṭe tākser mantor' injer gava vehter. ad kēnci nākun bey ānand lāgta. ⁴ barosataga nime nāvor marin dātnoni āndi. nā mari-miyaḍ satne tākser manter inval gosţit ter adik nākun ānand siyval dusro bade sele.

gayiyun adikār siyval

⁵ lāḍnor sōpta! nīkun voḍki selur vūr, dusro muluknur baktalir vāteke gir bati, nime mān-pān cokoṭ kīser manti. ^{6–7} vūr baktalir nīva permatun bārete carciturkun gava vehter. bavisatne ātur parbuna vacan vehvalir baktalir, kiristun nammaki vūra madat yētvakne sariy nihga vānirte, bagavantal ānand yētnal vūrkun madat kīser man. ⁸ dusrurkun vūr

^{*} **1:3** *yēsunur baktalir:* itteke yēsuna bōda vehcer tirivalir.

pacar kiyval satemnaga maraţ īsadārk āyana itteke, tapvak ātura mān-pān sūḍana.

vāyuţun suţi kīsi cokoţun piysi tākana

⁹ nana agaţa carciturkun undi gosţi lihi kīton. bati vūrgaţal voror adikāri āka inval diyoterpes mā gosţi vopser selor. bāriteke tanva poro unde bōre adikāri manva intor. ¹⁰ acore āyva, vāyvalir baktalirkun mān-pān kiyor ani dusrur kīkom itteke gir vopser selor. ahan mān-pān kiyvalirkun addam āser, vūrkun carciturgaţal aladi vāţser mantor. ani mā bārete āyong-sonong av bey karab vadkser mantor. aden sāţi nana vāta peje, vōn bārete vehci, tohanton.

¹¹ nā lādnor sopta! nime vona namuna yēcci tākma. vāyutun āyva cokoţune piysi tāka. cokoţ kiyval bagavantanor āndur. vāyuţ kiyval bagavantanor āyor.

¹² dēmetrin bārete carcitur samdir cokoţ vehcer manter. bagavantana satemun piysi vor tākta kāḍki, ad satem gir cokoṭnor injer gava sīser manta. maraţ gir ad karalen injer vehcer mantaţ. mamoţ vehval satem injer nīkun tāva.

ākritang gosting

¹³ unde vele gosting nīkun lihi kiyana injer manta. bati sāyte ani pontinte lihi kiyval nākun pasand sele. ¹⁴ nīkun baske sūdka inal bey jīva āser manta. ahan marat bēte māta peje mukabili vadkakat. ¹⁵ bagavantal nīkun sānti siyir! ige manvalir soptalir nīkun dandos vehcer manter. aga manval har voror soptan māva dandos veha.

© 2023 Wycliffe Bible Translators, Inc. This project text is licensed under a CC 4.0 International License. This colophon line is the result of the project-level override working.